



## CCAP GENERAL ASSEMBLY PASTORAL LETTER

### “NDIMWE KUNGWERUKA KWA CHARU” (MATEYU 5:14)

#### **Mazgu ghakwandurapo**

General Assembly ya Church of Central Africa Presbyterian (CCAP) ni chuwulu cha ma Sinodi agha; Livingstonia, Nkhoma, Blantyre, Zambia na Harare. General Assembly ndilo khoti likulu lakulongozga ma Sinodi mu kendeskero ka vinthu na ndondomeko zakhe. Yikakhazikiskika ku chaka cha 1924.

Mu chaka cha 2024, tikawa na mwambo wakukumbukira kuti pajumpha vilimika 100 chikhazikiskireni uteweti wa CCAP General Assembly iyi. CCAP ni mpingo ukulu chomene muno mu Malawi pa mipingo iyo yilikufumako ku chikatolika ndipo mpingo uwu wawovwira pakuchita vitukuko vinandi mucharo chithu ichi mu vigawa nge maluso gha wanthu, masambiro, vya umoyo, vya kulima na vinyakhe. Wanthu wanandi awo wali mumaudindo ghakulughakulu mu Malawi, mu boma kweniso makampani mba CCAP. Vipani vose vandyale vina wa Khristu wanandi wa CCAP. Mwantheura, tinachigomezgo kuti mamembala gha CCAP ghangawovwira kutukula charu chithu – pala wangateweta nakawiro ka Chikhirisitu – kweniso wangananga vinthu, pala wangaleka kuteweta na kawiro ka Chikhristu.

Ise, walongozgi wa CCAP General Assembly, talemba chikalata ichi ku mamembala ghithu na ma ulato ghawiri agha: chakwamba, kuwaphalira kuti waleke kutolapo lwande lakupangiska kuti masuzgo agho ghali mu Malawi ghalutilire; ndipo chachiwiri, kuwachiska kuti watolepo lwande pakusanga nthowa zakumazgila masuzgo agho Malawi wakukumana nawo. Chikalata ichi chagawika mu vigawa vinayi: Uzimu, Chitukuko, Ulongozgi and Ndyale.

## 1. UZIMU

Nga mpingo wakupandika pa mazgu gha Chiuta, tikumanya kuti kukula mu uzimu ni jando la kusintha kwenecho kwa wanthu, mabanja, mitundu kweniso charo chose. Fundo zakulondezgapo izi zikupeleka usambizgi ku mamembala ghose gha CCAP:

- 1.1 apo tikupulikana na kuchiska za umoyo wa pemphero kwa mamembala gha CCAP, tikumuchiskaniso kuti muwe wakutokatoka kuti musangenge chakulya cha zuwz na zuwa pamwekha. Tisambile kwa Mtumiki Paulosi, wakawa mteweti wamagomezgeko kweniso wamalulombo kwa Chiuta; kweniso, wakatewetanga na mawoko ghake. Mazgu gha Chiuta ghakutisimikizgila pa Milimo ya Wakutumika 20:34, ***"Imwe mukumanya waka kuti mawoko agha ghakachitanga ntchito kuti ndisange vyose ivyo ine na wanyane tikakavukanga"***.
- 1.2 Tikuchiska ma membala ghose gha CCAP kuti wawe ungweru wa charo chithu, nyengo zose, pa malo palipose kweniso mu kawirro kalikose mwakulondezga ivyo mazgo ghakuyowoya pa Mateyu 5:16, ***"nthaura ndimo ungweru winu uwalirenge panthazi pawanth mwakuti para wakuwona milimo yinu yiweme, wachindikenge Wawiskemwe wakuchanya"***.
- 1.3 Tikuchenjezga mamembala ghose gha CCAP kuti kuli visambizgo na uchimi wautesi. Kumbukani mazgu agho Yesu wakayowoya pa Mateyu 24:11, ***"Ndipo nchimi zitesi zinandi zamkuwoneka nakupusika wanthu wanandi"***. Kweniso umo wakayowoyera kwizira mwa Petrosi; 2 Petrosi 2:3, ***"Ndipo mu uzukusi wawo wasangilengepo mwawi pa imwe pakumuphalirani mazgu gha upusikizgi"***.
- 1.4 Tikuchiska mamembala ghose gha CCAP kuti mungasambizganga waka za chitemwa na umoza yayi, kwene ndiko kawe kawiro kithu. Nangawuli tikufuma vigawa, maboma, na mitundi yawanthu yakupambana, tili wamoza mwa Khristu, ndipo tilikupika mazaza na Chiuta kwiziska umoza mucharo chithu. Yesu Khristu wakatilombera kuti tiwe wamoza (Yohane 17:11)
- 1.5 Apo tikumanya kuti kugwiriska ntchito intaneti na ma uthenga ghapa foni nkhwakukhumbikwa, tikuchiska ma membala ghose gha CCAP kuti tilutilizge kusopa pamoza na wanyithu, mmalo mwakuwa na chisimu chakusopa pa intaneti. Mazgu ghakutichiska kufuma pa Waheberi 10:25, ***"Tingakhalanga chara ku maungano ghithu nga ndi umo wanji wakuchitira, kweni tichiskanenge yumoza na munyakhe, chomenechomene para tikuona kuti zuwa la Fumu likuneng'enera"***.
- 1.6 Tikuchiska ma membala ghose gha CCAP agho ghana maudindo ghapachanya mu boma kweniso muma kampani kuti wagwiriske ntchito udindo wawo pakusambizga kawiro ka Ukhristu. Tipemphe chomene awo wali ku vigawa vitatu vyakwendeska boma: Ku Ekizekitivi, Ku Khoti, naku nyuma yamalango kuti walongolenge nkharo yiweme. Pakuti mwawaKhristu withu muli walongozgi uko, wa Malawi wakhale na umoyo uweme, kwiziska masuzgo yayi chifukwa cha kawiro kaheni. Mazgu ghakuyowoya pakweru pa Zintharika 29:2; ***"Para walunji wakuwusa wanthu wakusekerera, kweni para waheni wakuwusa, wanthu wakatampha"***.

## 2. CHITUKUKO

Kwakuyana na masuzgo agho tikujumphamo kwasono mu charo chithu, nchakwenerera kuzomerezga kuti vilipo viwemi ivyo vyachitikapo kweni paliso vinandi vyakuti vichitike. Fundo zili musika umu zasankhipapo waka kuti tilongole ivyo vyachitikapo kweni ivyo tikwenera kuchitapo nga mamembala gha CCAP.

- 2.1 Apo tikakondweranga mu chaka cha 2024 kuti pajumpha vilimika 100, tikapatawula za wowwiri uwo mpingo wachitapo pakutheleska walwani watatu wa charu chithu, awo tilikuwasanga kufumira mu chaka icho tikatolera wanangwa: njala, nthenda na sanje. Walwani watatu awa tili kuwawika na mu sumu ya fuko lithu kwambira mu chaka cha 1964. Mwasoka, ivi vichalipo mupaka mwahuno. tikupempha ma membala gh CCAP na mipingo yinyakhe yose kuti tiwukire muchanya nakulongozga kuti vinthu visinthe. Tileke kugomezga wandiyale kuti wangatimazgila njala; nthenda, na sanje.
- 2.2 Tikuwonga boma apo likuchitapo vinandi vyakukwezga umoyo wa Malawi, ngati kugawa vyakulya ku wakusuzgika, kapanga misewu yiweme, kupeleka ngongole za NEEF, kupeleka ndalama ku wakavu na vitukuko vinyakhe. Tikupempha mamembala ghithu gha CCAP awo mba longozgi muma department agha kuti walongole bambilo liweme. Nga walongozgi wa General Assembly, tikukhumba yayi kuwona kuti mamembala ghithu ghakuchita ivi:
  - a. Kupanga vitukuko vyambula kukhola apo mamembala gha CCAP ghakugwira nawo ntchito
  - b. Vimbundi nd unkhungu uko ma membala gha CCAP mbalongozgi
  - c. Sankho apo mamembala gha CCAP ghali nawo paulongozgi
  - d. Kutchedweska kweniso kutondeka kupeleka weluzgi uwemi apo mamembala gha CCAP ndigho ghakulongozga
- 2.3 kuguliska katundu wakwanangika na wanthu wanyakhe wakuchita bizinesi. Tawona na Chitima chikulu kuti wakuchita bizinesi wanyakhe wakuguliska katundu wakwanangika. Wakuchita malonda wanyakhe wakuwuskamo ma deti awo katundu wanangikilenge ndipo wakuwikamo ma deti ghanyakhe. Uku nkuchita uheni ndipo tingazomelanga yayi kuti vichitikenge mu Malawi muno. Mwasoka, wanthu awa wakugwiriska ntchito wa Malawi wanyithu kuchita maliso agha. Tipemphe mamembala ghose gha CCAP na wose wakukhumba kuchita makora kuti wapelekenge ma lipoti ku walongozgi wakwenerera pala tawona kachitilo aka.
- 2.4 Kusintha kwa nyengo kwiza na masuzgo ghanandi pacharu chapasi kweni mu charu chithu. Mukumbukenge kuti ng'amba na mphepo zankhongono vyanangapo vinthu mu charo chithu. Mwasoka, masuzgo ghanyakhe agho ghalipo tachita kupangiska tekha tawanthu. Nga CCAP General Assembly, tikupempha mamembal ghithu kuti tileke kuchita ivi:
  - a. Tileke kudumula makuni, kweni tiyeni titolepo lwande lakupanda makuni nakughapwelelera

- b. Tileke kuzenga manyumba mumphepete mwa mulonga kweniso muma dambo, kweni, malo agho tigwiriske ntchito pa ulimi. Tilekeso kulima nakuzenga nyumba mumapili kuti tipewe Ngozi kweniso kutaya umoyo pala phiri lagumuka
  - c. Tileke kuguliska chakulya chidoko icho takolola
  - d. Tileke kuguliska malo. Ukavu ukumala yayi pala mwaguliska malo.
  - e. Tileke kugomezga boma kweniso wakuchita ndyale kuti wangamazga ukavu withu na njala
  - f. Wose awo wakuchita ndyale kweni mba CCAP, kwali wakulamula olo wakususka, kuti waleke kugwiriska ntchito ukavu na njala kuti yiwe nthowa yakukopera wanthu
- 2.5 Walongozgi wa CCAP General Assembly wakukumbuska mamembala ghose gha CCAP kuti ghakolelaneko pakumazga nthengwa za wan ana nkha zose izo zikuchitika ku wana. Waliska wa CCAP wakukumbuskika kuti wangakwatiskanga yayi nthengwa za wana awo wandakwane vyaka 18. Wapapi nawo wakukumbuskika kuti Chiuta wali kuwapa udindo kuti watemwenge na kupwelelera wana wawo. Lekani kuzomelezga panyakhe kuchichizga mwana kuti watengwe apo vyaka 18 vindakwane.
- 2.6 Nkhaza zamunthengwa zilije malo mu vikaya vya mamembala gha CCAP. Nkhaza munthengwa nkhwana, tiyeni tiwaphalire walongozgi wa mpingo na wa police pala ivi taviwona.
- 2.7 Ma membala gha CCAP ghaleke kukhala nyengo yitali kucheza panyakhe kuwonela pa interneti na ma foni. Nyengo tiyigwiriske ntchito makora mu uteweti wakupinduliska. Kweniso, tileke kutuma ma uthenga gha utesi na kunanga mazina gha wanyithu ng ani umo mazgu ghakuyowoyera pa Kufuma 23:1-2; ***“Ureke kutandazga lumbiri lwa utesi. Ureke kuzomerezgana na munthu muheni, kuti uwe kaboni wa utesi. Ureke kupulikana na wanthu wanandi pakuchita uheni. Para ukupeleka ukaboni wako mu mphara ya milandu, ereke kubendezga weruzgi wakunyoroka kuti ukondweske wanthu wanandi”***.

### 3. ULONGOZGI

Ulongozgi uwemi ni jando la mtende, bata, na chitukuko mu charu. Nga wa Khristu, tili kuchemeka kuti tilongole nkharo yiweme kweneso ntchito ziweme uko tikuteweta chomenechomene ku mawupu gha chitetezo, naku ma khoti kuwoneseska kuti mu charu muli mtende na urunji. Fundo zili musika izi zikulongosola khumbiro lithu pa nkhani ya ulongozgi

- 3.1 **Chitetezo.** Mabungwe gha chitetezo ghaliko kuti ghatumikile tose kwambura sankho. Chakupa chitima ntchakuti wanthu wanandi awo wakugwira ntchito mu mabungwe agha wanakawiro kaweme yayi ndipo wakuteweta makora yayi pakowira wena Malawi. Tikupempha ma membala gha CCAP agho ghakugwira ntchito mu mabungwe gha chitetezo kuti watewetenge na kawiro kaweme, apo wakumanya kuti wamupatawula pamaso pa Chiuta. Awo wali

muma udindo waleke kugwiriska ntchito wa chitetezo pakuchitira nkhaza wanyawo. Wa Malawi wose wapweleleka mwakuyana

- 3.2 **Ma Khoti.** Apo tikuwonga wa Pulezidenti withu kuti wasa zgilako unandi wa wanthu wakugwira ntchito ku Khoti, milandu yinandi yikutchedwa kumala. Mukumbukengeso kuti ku khoti nakuti kuli kuvumbukwa milandu ya vimbundi, ichi chikupangiska kwenjelwa pakati pithu. Tikupempha ma membala gha CCAP agho ghakugwira ntchito ku khoti kuti wakanenge vimbundi. Mazgu gha Chiuta ghakutichenjezga muMaranga gha Chiwiri 16:19; **"Muleke kubendezga mrandu pakweruzga nanga nkhuwa wakutemwera. Mureke kupoka vimbundi chifukwa vimbundi vikubulumutizga maso gha wavinjeru nak wananga mrandu wa warunji"**.
- 3.3 **Vimbundi.** Boma ili lilipo sono ili apo likatolanga mpando, likalayizga kuti limazgenge vimbundi mu Malawi. Ntchakubisika yayi kuti vimbundi vikulutilira mu charu chithu. Ise tikuti:
- Vimbundi vikuchitika panyengo iyo tikuguliska na kugula katundu, muma ofesi, na walongozgi muma udindo ghose
  - Chatikhwaska chomene kuti ma membala ghithu gha CCAP ndigho ghali panthazi kuchita vimbundi muma ofesi na mabizinesi ghawo.
  - Tikuchiska ma membala ghose gha CCAP kuti ghaleke kuchita vimbundi muma ofesi, ma bizinesi, kweniso wose awo wali muma udindo ghakulughakulu.
- 3.4 **Kuteweta mu unenesko na mu urunji.** Unesko ukukhumba kuti munthu wayowoyenge pakweru kwambura kubisizga kanthu kweniso urunji wakuti wazomerenge pala chinthu wachita ndiyo. Kwene, awo wakutilongozga sono wakuteweta mu unenesko na mu urunji yayi. Nga ni CCAP General Assembly, tikuti:
- Walongozgi wose wambe kuteweta mu unenesko na mu urunji chomenechemene apo wakugwiriska ntchito ndalama zithu za misonkho na izo tikupeleka mu mpingo
  - Wena Malawi wakukhumba kumanya umo chuma chawo chikugwirira ntchito. Mwa cherezgelo, unenesko na urunji ukuwoneka yayi umo CDF yikwendera.
  - Tikuchiska wimiliri wakumphala ya Malango awo ni mamembala gha CCAP kweniso wakulongozga pakugwiriska ntchito ndalawa za wena Malawi kuti wawe na bambiro liweme. Mukumbukenge kuti tikwenerera kulongola kuchita urunji pamaso pa Chiuta na pamaso pa wanthu
  - Mwakulutilizga, tikukumbuska walongozgi wose wa mpingo CCAP na ma dipatimenti ghithu kuti fichitenge unenesko na urunji nakuvilondeska mwa uzimu.
- 3.5 **Ndalama za vyalo vinyakhe.** Ntchakubisa yayi kuti chuma cha Malawi chikwenda makora yayi chifukwa chakusowa kwa ndalama za vyalo vinyakhe. Ichi chapangiska kuti mitengo ya vinthu yikwere chomene kweniso ktu katundu

munyakhewasowenge mu charo chithu. Wena Malawi wakulira, umoyo wasuzga. Nanga tikumanya kuti chuma chikwenda makora yayi pa charu chose chapasi, kwene tikumanyaso kuti pali vinthu vinandi ivyo boma likwenera kusintha umo likwendeskera chuma. Boma lisange nthowa zakovwira kuti ndalama za vyale vinyakhe zisangikenge mu charo chithu. Tikumema ma membala gha CCAP kuti ghaleke kutola lwande lakupanga bizinesi zambula kuzomelezgeka pa ndalama za vyalo vinyakhe.

3.6 **Migodi.** Migodi yakwiziska ndalama zinandi yilikusangika mu vigawa vinandi muno mu Malawi. Ivi vingasintha nadi chuma cha Malawi. Kwene, chofyo icho ulongozgi wa CCAP General Assembly ulinacho ntchakuti vimbundi ndivyo vyatola malo muno mu Malawi. Mantheura ise tikuti;

- a. Kutchedwa kwamba ntchito za migodi kwiziska chofyo chikulu chifukwa pali wanthu awo walikwamba kale kujima malibwe ghakudula agha, ndipo boma likumanya. Tilikupulika kuti banki likulu muno mu Malawi la Lizevu ndilo likugula malibwe agha. Tikumanya cha usange wakugula malibwe ghose panyakhe ghachoko waka.
- b. Nkhani zakuti wakutola dankha malibwe ghakuti wakaghayezge zikulutilira. Tilikupulika kuti malibwe ghithu ku Malawi kuno ndigho ngawemi chomene nakutiso nganandi, kwene tikuwona chilichose yayi kuti ntchito za migodi zayambika
- c. Nkhuwachonjola wena Malawi kuti iwo wapokenge 10 pelesenti ya phindu la migozi yawo, naumo nkhani zikupulikikwira. Malawi wakwenera kupilikira fundo panyakhe kutchedweskeka na malango gha wanthu wakuwalo yayi. Boma na wose awo wakovwirana nalo wasange nthowa na kuteweta mwaluwiro kuti wawuske chuma cha charo chithu pakuti nchakufwa
- d. Tikupempha ma membala gha CCAP agho ghakugwira ntchito za migodi walongozge makora nakovwira kusintha chuma cha charo chithu, waleke kukolelanako na awo wakuchedweska ntchito kweniso kwiziska vimbundi na ndyale pa nkhani za migodi.

#### 4. NDYALE NA VISOLA

Tchalitchi lina udindo wakulongozga wa Khristu umo wangachitira pa nkhani za ndyale, chomene chomene apo sono tikuya ku visola. CCAP General Assembly likuwoneseska kuti bambiro liweme na kutolapo lwande pa ndyale mu mtende viwe vyakukhalilira kweniso kuti kawiro aka ndiko kasungikenge;

- 4.1 Tileke kugwiriskika ntchito na wa ndyale. CCAP ni tchalitchi, ntchipani cha ndyale chara.
- 4.2 Tileke kugwiriska ntchito walongozi wa ndyale awo wakukhumba kusoleka kuwa nthowa yakusakatira ndalama. Pali kawiro kakuti mpingo ukuchema na kupeleka mpata ku wandyale pa nyengo ya usakati. Kawiro aka kalekeke. Mpingo wa Yehova ungawanga wakwenjerwa mwa ntheura chara. Tisange nthowa mu mazgu gha Chiuta zakusangira chuma cha mpingo.

- 4.3 Walongozgi wa CCAP General Assembly wakukumbuska Waliska wose na wose awo wakupharazga kuti waleke kupharazga ndyale kwene waparazgenge mazgu gha Chiuta. Tili kuchemeka na Chiuta, ndipo tamupatawura kwa Chiuta. Mwantheura tikwenera kop ana kukondweska Chiuta pera.
- 4.4 Nangawuli tikumanya kuti munthu waliyose wana Ufulu wakuwa na chipani cha ndyale icho wakuchitemwa, kweni waleke kugwiriska ntchito katundu panyakhe tchalitchi pakupanga ndyale.
- 4.5 Walongozgi wa CCAP General Assembly wakuchonjola nkha za zose izo zikuchitika mu charu chithu. Tikumema ma membala ghose gha CCAP kuti wafumeko ku nkha za vipani. Tikumema ma membala ghose gha CCAP agho ghali mu ma udindo muma bungwe gha chitetezo gha boma kuti wagwiriske ntchito mazaza ghawo pakukanizga nkha za zose nakukaka wose awo wakupanga nkha. Tikugomezga kuti ma membala ghose gha CCAP ghalongolenge umoyo uweme wa chi Khristu nga wana wa Chiuta mu kuteweta kwawo. Mazgu gha Chiuta mu Mateyu 5:9 ghakuti; **"Mbakutumbikika awo wakuwika mtende, pakuti wati wawachemenge wana wa Chiuta"**. Mwantheura, tikuchonjola nkha za zose izo zikuchitika mu charu chithu.
- 4.6 Wose awo wakutolapo lwande pakunozgekera na kwendeska visola wapeleke mpata uweme na wakwenerera kwa wose. Pawoneke unenesko na urunji pakulongozga na kwendeska visola. Tikumema ma membala ghose gha CCAP agho ghali mu Malawi Electoral Commission na mabungwe ghose agho ghakutolapo lwande lakwendeska visola vya chaka chino kuti watewete nama gomezgeko, apo wakumanya kuti wakwenera kuchita urunji pamaso pa Chiuta.
- 4.7 Kumbukani, kuti ku vipani vinandi kwawa kudandaula kuti visola vya kuvipani vyawo kunandi vilikwenda mwa ukhuluku. Ntchakupeleka Chitima apo tikuwona kuti wanthu wanyakhe awo wakachitanga ivi mba Khristu kweniso wanyakhe mba mpingo wa CCAP. Ulongozgi wa CCAP ukuchombola kawiro aka, wapeni mpata wanthu kuti wasole walongozgi waku mtima kwawo.
- 4.8 Ulongozgi wa CCAP General Assembly ukulondezga na lwana lose vidumbirano ivyo vipani vikuchita kuti wavangane pamoza apo wakunozgekera visola vya chaka chino. Usambizgi withu ngwakuti vipani visolane nakuvangana kwambura kutemwera. Wena Malawi wakukhumba chara kulongozgeka na vipani ivyo walongozgi wakhe mbazukusi. Kukoleranako kwa vipani kuwovwire kwiziska pamoza walongozgi awo wana Mbiri ziwemi, wana mtima wakowira wena Malawi wose mtundu umoza, dela panyakhe mpingo chara. Tikuchiska ma membala gha CCAP mu vipani vyakupambana pambana kuti wovwire kunyolora kawiro ka chipani chawo. Tilondezge mazgu agho fumu yithu Yesu Khristu yikayowoya pa Mateyu 5:14-16, **"Imwe ndimwe ungweru wa charu. Msumba wakuzengeka pa phiri kuti ukubisika chara. Wanthu kuti wakukozga nyali na kuyiwika kusi ku chidunga chara, kweni wakuyiwika pa malo ghakuwonekera ndipo yikuwalira wose wa munyumba. Ntheura ndimo ungweru**

**winu uwalirenge panthazi pa wanthu, mwakuti para wakuwona milimo yinu yiweme, wachindikenge Wawiskemwe wakuchanya."**

- 4.9 Ulongozgi wa CCAP General Assembly ukuchiska wose awo wali kulembeska kuti wamuzalute nakukaponya voti yawo. Tileke kukavotera wanthu na chifukwa chakuti tikufuma kumaza, panyakhe ni mtundu withu, panyakhe ngwa mpingo withu. Tizavotere walongozgi awo ulato wawo ukulongola kuti utukulenge charu chithu kweneso upindulirenge waliyose. Mazgu gha Chiuta ghakutisambizga pa Kufuma 18:21, **"Kweniso usole wanthu wamahara kufuma mu wanthu wose, weneawo wakopa Chiuta, awo mbakugomezgeka ndipo wakutinkha vimbundi."**
- 4.10 Apo tikuya kukavota, tighanaghanilenge walongozgi awo wakunwekera kukwezga chuma chithu. Walongozgi awo wakulongola kuti wazamufiska ivyo wakulayizga. Tileke kuvotera walongozgi awo wakutondeka kufiska vilayizgo vyawo kweniso urunji na unenesko mwa iwo mulije.
- 4.11 Tikuchiska ma membala ghose gha CCAP kuti waleke kuzavotera walongozgi na vipani vikugwiriska ntchito nkhaza kuwa nthowa yakwiziska mantha nakujala wanthu pa mulomo.

#### **MAZGU GHAUMALIRO**

Ulongozgi wa CCAP General Assembly ukumema ma membala ghose kuti ghawe ghakukolelanako, ghawe ghakutemwana kweneso kovwirana yumaza na munyakhe. Tiyeni tilomberenge charu chithu, mu manyumba na mipingo yithu. kumbukani mazgu agho Chiuta wakayowoya kwa wana wa Israyele kwizira mwa Ntchimi Yeremiya; Yermemiya 29:7, **"Msumba uwo ndamutumaniko kuti muwe wamikori, muwupenjerenge mtende na uweme. Muwuromberenge kwa FUMU, chifukwa usange msumba uli na mtende namweso mukhareng mu mtende."**

#### **Chiuta wamutumbikani. Chiuta watumbike Malawi**


SIGNED BY:



Rt. Rev. Biswick Kamzonga Nkhoma  
**MODERATOR, CCAP GENERAL SYNOD**




Rev. Edward Masona Tembo Kaluluma  
**MODERATOR, NKHOMA SYNOD**




Rev. Dr. Humphreys Zgambo  
**MODERATOR, BLANTYRE SYNOD**



Rev. Dr. Mwawi Chitongozi  
**SG. CCAP GENERAL SYNOD**



Rev. Vasco Kachipapa  
**GS. NKHOMA SYNOD**




Rev. Anderson Juma  
**GS, BLANTYRE SYNOD**

PP



Rev. Jairo Kamisa  
**MODERATOR, SYNOD OF LIVINGSTONIA**



Rev. William Tembo  
**GS. SYNOD OF LIVINGSTONIA**